



**Kalaallit Nunaanni tamat oqartussaanerata innuttaasunillu peqataatitsinerup killiffia naammaginatumik inissisimanersoq pillugu apeqquteqaat aallaavigalugu oqallinnissamik siunnersuut.**

(Inuit Ataqatigiit Inatsisartuni)

Tamat oqartussaanerata isumaqarpoq inuinnaat naalackersueqataanerata, politikikkullu aaqqissuussineruvoq innuttaasunilu amerlanerussuteqartunut pissaaneqartitsuulluni.

Tamanna isumaqarpoq innuttaasut pingaartitatik malillugit, politikerinik qinersinikkut toqqaasartut, taakkulu nunami aqutsisussanngortinneqartarput. Politikerillu taakkua amerlanertigut partiinut aaqqissuussimasartut Inatsisartuni aaliangiinissamut amerlanerussuteqarnissartik sorsuutigisarpaat.

Ilaasortat ataasiakkaat amerlanerussuteqarnissamut sorsunnerat Inatsisartuni sammisani tamani pisarpoq. Aamma partiini ilaasortaagaluarunik. Tamanna isumaqarpoq ilaasortat tamarmik Inatsisartunut qinersisoqannginnerani aamma partiimi siunnersuutiminnut amerlanerussuteqartariaqartartut. Partiimi amerlanerussuteqartut aaliagertarpaat ilaasortat ataasiakkaat siunnersuutaat sorliit ingerlateqqinneqassanersut.

Tamat oqartussaaqataaneranni aamma ikinnerussuteqartut tusarniartarnissaat pisariaqarpoq. Tamanna pisinnaavoq, Inatsisartuni ilaasortat tamarmik tusaaneqarsimatillugit, Inatsisartuni isumaqatigiinniarnikkut siunnersuutit sammineqareernerata kingorna Inatsisartut aatsaat aalajagiisarpata.

Saniatigullu aamma pisariaqarpoq soqutigisaqaqatigiit kattuffii Inatsisartunut attuumassuteqanngitsut tusarniaavigisarnissai. Kattuffiimmi taakkua partiinik tunuliaquteqanngillat, siunnersuutilli aaliangersimasut soqutigisaqarfigalugillu ilisimasaqarfigisarpaat. Taamaaliortoqartillugu inatsisartuni aalajagiunneqartut aamma ilisimatusarnermik tunngaveqarluartarnissaat qulakkeerneqartarpoq.

Inuinnaalli naalackersueqataanerata tunngavianut utissagutta amerlanerussuteqartut aalajagiisarnerat tassarpiaavoq inuinnaat naalackersueqataanerannut tunngaviusoq.

Inuinnaat naalackersueqataanerata pitsaanerpaaffimminiillunilu sunniuteqarluartuussappat peqataasut tamarmik amerlanerussuteqartut aalajagiussimasaat ataqqillugillu malittariaqarnissaat pisariaqarpoq. Sammisani tamani ikinnerussuteqartoqartarnera pissusissamisoorpoq. Ikinnerussuteqartut Inatsisartuni isumaqatigiinniarnermi tusarneqarsimappata, taava oqartoqarsinnaanngilaq ikinnerussuteqartut tusaaniarneqarsimanngitsut. Isumaqaannarpormi amerlanerussuteqartut allatut isumaqarsimammata, ikinnerussuteqartut kissaatigisimasartik pisimanngikkaat.



Ullutsinni tusarsaajuarpoq ikinnerussuteqartut – amerlanerussuteqartut aalajagiisimanerata kingorna – amerlanerussuteqartunit tusaaneqarsimanginnerarlutik naammagittaalliortartut.

Amerlanerussuteqartut aalajagiussaata ikinnerussuteqartunit ataqqineqartanngippata, killormulli ikinnerussuteqartut tusaaneqarsimanginnerarlutik naammagittaalliortuarpata tamat oqartussaaqataanerannut nukittorsaasuunaviangilaq.

Kinaluunniit amerlanerussuteqartunit allaanerumik isumaqarnissaminut kiffaangissuseqarpoq, taamannali amerlanerussuteqartut aalajagiussaannut ataqqinninnginnissamut pisussaaffiliinngilaq.

Demokraatit paasisinnaangilaat sooq Inatsisartut ataatsimiititaliaani aalajagiunneqarsimasut, Naalakkersuisunullu piffissami massakkut sammisani assigiinngitsuni iliuuseqarnissamut pisussaaffiliisumasut maanna ilanngunneqarmata. Ataatsimiititalianimi Inatsisartut tamarmik sinniisoqarput, taamaalillutillu Naalakkersuisunut assigiinngitsunik pisussaaffiliisinnaasarlutik.

Ataatsimiititaliani ilaasortat Inatsisartunit inuttalersorneqartarput, partiillu ataatsimiititaliani toqqaannarlutik ilaasortaataqanngitsut partiit allat teknikkikkut suleqatigineratigut siniisoqarnikkut ilaasortaataqartarput. Taamaammallu Inatsisartut ataatsimiinnissaat aallartinngitsorli Inatsisartuni ilaasortat tamavimmik aataatsimiititaliani aalajagiunneqarsimasuni tusaaneqarsimapput.

Demokraatinit taamaalullita matumuuna oqallinnermut ilanngussaqaqqissanngilagut killormulli partiit tamarmik kaammattorusuppagut inuinnaat naalakkersueqataaneranni tunngaviumik piumasaqaataasut ataqqeqqullugit. Tassaavorlu amerlanerussuteqartut aalajagiussaata peqataasunit tamavinnik ataqineqartarnissaat.

Aappi, Demokraatit nalilerpaat peqataasut tamakkerlutik nunatta Inatsisartuini tusarneqartartut, tamannalu naammagisimaarparput.